

焦太史編輯國朝獻徵錄

焦太史編輯國朝獻徵錄卷之二十八目錄

戶部一

尙書

趙勉

郁新

王鈍

夏原吉

郭資

古朴

郭敦

李昶

金濂

王佐

張鳳

李敏

沈固

年富

張唐

馬昂

楊鼎

翁世資

殷謙

李衍

劉昭

李敏

葉洪

侶鏗

秦紘

錢唐徐象梅

吳興茅元儀

全校

錢塘徐象標

刊行

目錄終

焦太史編輯國朝獻徵錄卷之二十八

戶部一

戶部尚書趙勉傳

廖道南

趙勉夷陵人初爲國子生與錢塘沈潛山東侯庸吉安張衡同登洪武乙丑進士勉歷事工部審刑司左評議十九年試大理寺左寺丞擢大理卿二十一年陞刑部右侍郎是年五月戊寅上諭勉及茹瑞曰朕思天下將校軍士月給俸糧舊取之倉庾今將民間歲租給與庶官無出納之勞民免耗損之患卿等爲朕議之著爲令二十二年二月癸卯拜戶部尚

書錫之

誥曰昔君天下者首建倉廩府庫備懸儲

藏金帛以待軍國之需故必設官以司之是故天

子富有四海所以履滿盈示儆戒也苟使奸臣在側

不問民之艱苦動以悅君則事墜矣若賢臣必欲

致君富敷奏府庫之儲乃民之膏脂毋使妄費謹

其出納民無橫斂國有常經大道彰君德美矣

朕于是職必惟其人今特命爾勉爲戶部尚書於

乎量入爲出毋擾于民至公無私永懷朕命二十

二年五月壬子上諭勉曰務農重穀王政所先

故三年耕餘一年食九年耕餘三年食雖歲或不登

民無饑色以儲蓄有素故也 朕屢敕有司課農桑
儲蓄未備一遇水旱民既饑困茲欲置倉廩于中原
歲豐則給價糴穀凶則賑貧煦孤庶使民得足食野
無餓莩爾其行之二十四年正月戊申勉奏都督張
銓已封永定侯宜給其祿賜松江官田從之二十五
年閏十二月坐贓法當死劉三吾以勉爲壻自陳其
罪併禡其爵

史南曰臣讀國史始知勉受 高皇之知觀其 詔
諭諸篇惓惓以卹民節財爲意視文景免租軫閭郡
國者何怨復也乃勉亦不克終豈君臣相遇自古爲

難哉

尚書郁公新神道碑

解縉

國朝復先王之典禮所以付任才能用長舊典裁成
輔相以全天下之士保其初終恩兼新故大小之臣
咸稱職業班班有可稱道者豈惟天祐國家而賜之
以多賢亦國家深仁厚澤有以積累克稱天心也嗚
呼豈不盛哉乃洪武戊辰歲予以年少擢進士爲中
書舍人直翰林日侍講華蓋殿中時時引選官居前
講官不避卽顧問可否輒以對一日見鳳陽郁公於
脩果中資貌瓌偉音吐洪暢威儀整齊知心異之上
果賜名新卽命戶部度支主事支掌內帑賜予內直

所與文淵閣相邇也會嘗與之議論練達經歷久相
善也未幾公陞北平部郎中先是戶部其屬有四歲
分爲十二故有是命進階奉議大夫二十四年超授
嘉議大夫戶部右侍郎每奏事廷中 玉音顧問天

下地理陰陽戶口漕運之數民間利害無巨細皆盡
慮無所遺謬在廷之臣莫不以爲難而顧謙退每事
容度其屬能者未嘗以精敏自多名位自高人又莫
不以爲難及考滿遂陞尚書益寬大得體不爲瑣屑
授資善大夫喪母歸葬鳳陽賓客至者數郡益公平
生慷慨急於義饒財而好施尊禮儒生雅志喜交游

不爲冷熱變親戚有急患難不避治家有法綜理微
密而不傷於繁雖國家能曲成人才如公之才亦可
謂難能者也今永樂三年八月五日公卒于官上
賜棺斂祭之爲素服輟朝一日士大夫咸以爲榮

戶部尚書王公鈍傳

朱睦㮮

王鈍字士魯太康人也至正間舉進士授衛氏縣尹
元亡隱居敎授河津洪武六年徵至京師奏對稱旨
除禮部主事遷吏部總部郎中出爲福建左叅議轉
右叅政麓川回遷浙江左布政使期月以母喪去詔
徵詣闕諭之曰浙江非卿不可治襄事後勉起就任
以副倚注之懷命禮部厚加賻贈鈍懇請終制不許
在浙先後十年四境晏然當是時太祖宵旰圖治
藩憲重臣能勝任而久於其職者惟鈍與雲南布政
使張統太祖嘗稱於朝以勸庶僚革除間召統爲

吏部尚書召鈍爲戶部尚書又明年靖難兵至鈍潛
出城欲亡爲邏卒所執 文皇卽位召統與鈍諭曰
卿二人久事 先皇習知典故今皆老矣其解職務
月給尚書半俸居京師視時政有戾舊制竝向朕直
言之無隱庶稱厚望老成之意已而統自經於部之
後堂鈍承制巡視北畿山東事竣乞骸骨 上命以
布政致仕鈍旣歸鬱鬱不樂遂卒所著有野莊集六
卷刻於家

夏忠靖公原吉傳

丘濬

公諱原吉字維詰其先會稽人徙饒之德興祖希政仕元爲湖廣行省都事父時敏國初爲湘陰教諭始家焉母夢三閭大夫入其室生公公生有異資年十三喪父卽刻志向學以詩經領鄉薦卒業太學選入內廷書制誥擢任戶部主事大爲尚書郁公新所委任會大朝覲執政大臣劾諸司之怠事者有旨宥之郁堅請不已有劉郎中者忌公因奏公主使郁太祖以問郁郁對曰臣愚過聽堂後書算生罪甘萬死上意解宥之惟逮諸書算生于獄劉計不行復

以公專部事爲言 上察其奸并誅劉三載秩滿吏部引 涯見公跽面陳母老請歸省且曰臣去家遠乏僕從乞寬其程限并暫假在官隸卒從行 上特允之人以爲殊典是時公初爲部屬已爲 上心所眷注如此三十一年陞本部右侍郎命充採訪使巡撫福建尋又出鎮蘄州 太宗皇帝入正大統召還轉左侍郎踰月陞本部尙書 上勵精圖治凡建文時敎條政令有所更革者皆命公申明之凡三十餘事又明年蘇松諸郡大水奉命往治發浙西兵民數十萬疏決壅滯旣而上命僉都御史俞士吉齎水利

卷之二
水利

集往賜公俾講究拯治之法公乃集共事官屬濱河
吏民及凡諳曉水利之人博求參考以復奏謂嘉定
之劉家港徑通大海常熟之白茅港徑入大江是皆
大川水流迅急之處宜浚吳淞江南北兩岸安亭等
浦港以引太湖諸水入劉家白茅二港使之直注江
海又松江大黃浦乃通吳淞要道今下流壅塞難卽
疏浚傍有范家濱至南贛浦口可徑達海宜浚令深
闊上接大黃浦以達泖湖之水此卽禹貢三江入海
之跡俟旣開通相度地勢各置石牐以時啓閉每歲
水涸之時滌築圩岸以禦暴流如此則事功可成于

稅

民爲便 上從之一一如所言而行水患乃息又以
其民久勞而饑奏發廩三十餘萬石以賑之躬行督
勸散給有方全活者甚衆永樂三年秋八月召回掌
部事 上諭公曰向以部事付郁新而專委卿以浙
西農務庶內外克濟今新死付卿以部事卿其盡心
毋怠公首請裁冗食以省浮費量有無以均出入平
賦役以甦民困又言鹽法邊儲所係不許勢要開市
以妨商賈錢鈔國用所資不許富室專利以沮貨易
以至禁包攬戒侵欺清倉場廣屯種平價直皆請立
定規以施諸天下 上嘉納之時建文廢弛之後靖

難之師方息府庫空虛無有蓄積一時錫予功臣賞給士卒大封親藩增置武衛添設百司而又召集天下儒生數百人於館閣編輯大典未幾遣二十五將軍大興安南之役遣內官造巨艦航西南大洋海以通西南諸番財用之費以億萬計皆取給於戶部公晝夜焦勞經營綴葺惟恐拂上意而殫民財時初建北京採宮殿材於西南命公暫行督視自南京抵北京給以官校察其怠事者懲治之公卽榜諭軍民使其趨事懲一以戒百人人效用事濟而人安行至德州有旨召公還且諭公曰行止卿自度之朕不

中定也七年春二月 車駕巡幸北京命兼行在禮
部都察院事扈從歲餘 上以北虜犯邊親帥六軍
征之時 宣廟以皇太孫留守北京命公輔導兼行
在六部都察院大理寺事庶事修舉京師肅清 上
還大喜賜鈔幣鞍馬冬十一月 車駕還南京以從
行勞賜休暇十日尋命輔 皇太孫周行鄉落以觀
民俗繼命閱武于郊以知兵事公所至隨事納忠多
有裨益九年秋九月九載秩滿 上親宴之別殿降
勅獎諭有循良篤實如古名臣之諭并賜誥封祖父
母十月 上以 太祖實錄建文時修多失其實永

樂初再修亦倉卒未備命史臣重修勅公與姚少師
廣孝監修未及成而姚公卒公獨專其事七年始成
上之十一年春二月扈從車駕巡北京十六年修
天下郡志命公提調十八年北京宮殿成奉勅召
皇太子皇太孫于南京既啓行公先馳奏上命東
宮宜緩行公見具傳上旨東宮曰君親雖有命臣
子其敢緩乎公既至入見上問所以速來故公具
述東宮言以對上悅公因言連年營造民疲轉輸
逃亡者多今宮殿告成宜愛養民力凡各處流徙之
民請悉宥之新復業者蠲所負詔行之十九年夏三

廢災公上疏言請寬民力蠲負貸使民心悅則天意
可回上嘉納之是歲因災羣臣各言南北建都利便
不同科道官因攻大臣上命面辯于庭親御午門
樓視之密命中使詢公孰是公曰臣等罪也科道言
是上兩宥之或尤公背初議公曰不然天威嚴重
吾輩歷事久言雖失幸上憐之若言官得罪所損
不小衆皆嘆服冬十一月上以北虜携貳命公與
尙書方賓呂震吳中等議親征公等議宜且休養兵
民未奏會獨召賓賓言今糧儲不足遂召公問糧儲
多寡公對曰僅及將士之用不足以供大軍卽命公

往視開平兵儲吳中入對與賓同上怒急召公還
賓聞懼自殺公至命頌繫公于內官監籍其家惟得
賜鈔千餘貫餘皆布衣瓦器而已明年正月車駕
復北征出塞不見虜果以軍餉不足而還又明年
上崩於榆木川仁宗皇帝卽位卽日復公官公以
母喪未終辭仁宗勉留之曰國家不幸有大事正
賴相與共濟艱難安得遽去卿云有喪我無喪乎如
卿辭職朕亦不當在此公不復敢言賜賻禮遣官護
其喪歸營葬事宣宗以皇太孫正位東宮加公太
子少傅時呂震爲太子少師班公右卽進公少保仍

兼前職兼食三俸公固辭許辭太子少傅一俸同時
大臣當受誥命翰林呈草 上取筆增二語曰勿謂

崇高而難入勿以有所從違而或怠且諡學士楊士
奇等曰此實朕心蓋望卿等匡輔之功也繼召公等
至展前賜銀章一其文曰繩愆糾繆且諭曰朕有過
舉卿卽具奏來以此識之朕不難於從善也夏四月
命兼掌禮部事特賜象牙字印以便僉押其文曰正
直蓋以旌公也又以公有匡輔功賜第二區一在南
京一在北京田五頃 仁宗賓天預聞顧命時 宣
宗爲皇太子監國南京遣命徵還嗣位時有漢庶人

之疑中外洶洶羣臣欲出郊迎 太后命獨留公佐

裏王留守京師輔臣郊見 宣廟首問公及蹇少師

衆等不能對既至召公慰曰朕聞 太后諭知留卿

意卿奉 皇祖命輔朕有年非他人比卿當以所事

皇祖者事朕賜寶帶 宣廟既嗣位公以舊輔倚毗

尤重宣德元年漢庶人反移檄誣輔臣奸邪亂政以

公爲首蓋以大臣中公最爲 列聖所委者故指以

爲兵端 上夜召公等入議公免冠謝曰臣不才致

變親藩罪當死 上曰卿何爲是言彼蓋假卿以興

兵耳休戚與卿同之命公坐審議屏左右語揚文敏

公榮首勸

上親征

上難之顧公公曰往事可鑒

不可失也臣昨見命將而其色變退語臣等而泣在

廷如此則其臨事可知又曰兵事貴速且有辭宜卷

甲韜戈而往一鼓而平之所謂先人有奪人之心也

榮言是上意遂決卽躬帥六師征之晝夜兼程而

往師臨城漢庶人懼欲降猶令人繞城上而詈公

罪人旣得大被恩賞賜公聞者三人掖公朝叅出入

公固辭曰舊制非勲臣不敢用上曰卿輔導忠勲

非勲而何乃拜賜是歲扈從車駕巡邊旣還

上以蹇公及公等四人年老不欲煩以有司之政勅

公曰卿等事 祖宗積效勤誠朕嗣統以來尤資贊
輔夙夜在念圖善始終蓋以卿等春秋高尚典劇司
優老待賢禮非攸當況師保之重寅亮爲職不煩庶
政乃副倚毗可輟部務朝夕在朕左右相與討論至
理共寧邦家其專精神審思慮益致嘉猷用稱朕倚
耆老成之意繼賜銀章一其文曰含弘貞靜蓋以褒
公德量云五年春 兩朝實錄成賜宴于中府明日
入謝既退得微疾命家人具湯沐正襟端坐召其弟
及子告之曰吾以一介書生叨居重任愧無以報
國家言訖而終時五年正月二十七日也享年六十

有五先二日有星墜庭之西南隅光燭地者久之
上聞訃震悼命有司製棺給賻營葬遣禮部尚書胡
淡諭祭贈特進光祿大夫太師諡忠靖官其子瑄爲
尚寶司丞仍復其家自公侯貴戚下至郎曹將校咸
往祭弔衛卒京民亦爲流涕公性至孝少失怙母太
夫人守節公終父喪卽出教里塾取束修以資養及
通朝籍每出必候問起居公退非有客不離親側友
愛諸弟其弟有使酒者破其釀器家人奔告公笑曰
弟又醉邪畱二俸在南京資其用度略不計平生與
物無忤受人之惠雖微必報少時曾受知于邑教史

九韶既貴禮待如初恒分俸以濟其乏與人交忘勢
分篤親舊有無通共胡祭酒僦屋以居公得賜第卽
以所居讓之胡致仕去就嚮以爲贐谷庶人國于鄉
郡有逆謀爲蜀王所發上疑郡人有預者公請以
百口保之竟免究郭尚書敦使樂安州爲同事者所
譖公力爲救解遂得免其他如寬諸城妖黨解袁忠
徹危疑不念呂宗伯宿憾皆世所謂陰德大量者公
心無適莫渾渾然不見圭角小人有所觸犯虧損置
之不問公平居無事坦坦如也一遇事明敏奮發嘗
奉命兼理諸司政務吏牘滿前迎見立解拔根適節

各得其宜商功計利惟恐有弊恒曰不可使後人難
爲繼而戕吾民也其掌國計最久凡所建置區畫明
於閭閻斂散之術科分戶別有倫有要一一可爲後
法歷事 四聖隨事獻忠凡持論必歸仁厚存大體
天下之人陰受其賜者多矣一時大臣與公同功一
體者惟蹇忠定公時以蹇夏竦稱然外以政事
著稱于時而公兼有文學之譽自開 國以來三大
纂修皆公爲監修所著有文集若干卷傳于世云論
曰天開一代隆長之治必其創造者有可祖之功而
繼世者又得夫可宗之德也功立矣德修矣然非得

夫股肱心膂之臣以贊助彌縫於其間亦曷能有以固其基成其治而綿其祚於有永哉公初入仕時卽爲太祖皇帝所知迨太宗入正大統首蒙拔擢繼事仁宣二朝始終四十餘年專掌國計其間雖或兼他官釐別務總理諸司之事與聞機密之政未始一日離計相之任也於乎大學治國平天下之要顓顓焉惟在理財用人夫治道亦多端矣聖門授受皆不之及而獨舉理財以並於用人誠以用人爲治莫先焉財用旣足天下事無不可爲者矣列聖所以用公之意蓋有得於孔曾之傳也歟昔人論大臣

以懿量氣節學術才能四者並言謂非兼足不足以
當輔弼之任觀公掌國計當內難始定之餘多事紛
紜之秋國無乏絕之憂民享和平之福非明于學術
優于才能者其能然乎况又一時大臣中稱有裨益
者以公爲第一公其無愧古人所謂大臣者哉

又夏原吉傳錄

王 鏊

洪武三十一年陞戶部右侍郎 太宗入轉戶部左
侍郎旋進尚書凡貢賦役制悉命詳定兩浙大水命
公往治且命都御史俞某齎水利集賜之徧詢故老
水之源委時役兵民數萬撫恤之人人盡力布衣徒

步晝夜經畫目爲之赤盛暑或持蓋至曰衆赤體暴
日中吾何忍求涼決壅滯修隄浦濬溝洫治橋梁導
水入海水不爲患又奏發粟萬餘石以賑饑給牛具
種子與貧民吳人懷之姚廣孝還自浙西上首詢公
廣孝曰夏某古之遺愛也召還掌部事請裁冗食平
賦役均出入勿使勢要種鹽以妨商賈勿使富貴專
錢以沮貿易禁包攬侵欺之弊清倉場廣屯種皆立
定規初建北京宮殿採木運餉者命公出巡視給以
錦衣官校四十人律罪怠事者公登車卽諭官吏軍
民各虔乃事吾將出巡益恐犯者衆也人人感悅而

事衆八年 親征北虜命輔導 皇孫留守北京兼

掌行在六部都察院大理寺事諭之曰朕以房玄齡

李卿卿其盡心輔導時京邑諸司草創公每旦入朝

獨近 晨前參決機務退至政事堂郎官御史抱案

盈庭公口應手判不動聲色北奏 行在南啓 東

宮京師肅然七月 駕回北京公見便殿曰卿輔

皇孫居守事安民安參決機務咸當朕心公曰 陛

下之訓 皇太孫遵行之臣何功之有翊日 上諭

羣臣曰夏某輔導 皇孫今之周公也十九年三殿

災公言愛民所以敬天也乞蠲逋負及芻糧採辦金

銀課程優恤流移以回 天意從之詔求直言言者
多云建都北京不便主事蕭儀言之尤峻 上怒誅
之時科道亦云不當輕去金陵 上曰方遷都時吾
與大臣密議數月而行言者因劾大臣 上命言官
與大臣俱跪午門前對辯都御史陳瑛言科道皆白
面書生不知大計 上命左右至午門前問衆皆咩
罵言官公獨奏曰御史給事職當言路且應詔陳言
臣等備員大臣不能協贊大議臣等之罪也 上悅
兩省之交趾平 上問公陞實孰便公對以賞賚于
一時有限陞費于後日無窮乃陞首功餘皆班賚西

城法王來朝 上將親勞之公曰彼蕃化而來宜示以君臣之禮且上如是下必有甚焉 上曰爾欲效

韓愈耶他日法王見便殿 上命公拜公曰王臣雖

微加于諸侯之上況夷狄乎臣恐一屈膝有辱天子

臣死不敢奉詔 上笑曰卿過侍郎楊勉之拜彌兼

遠矣山東妖人唐賽兒黨三千餘人至公入奏曰諸

所俘俱平人悉原之衆遮道呼公生我公叱曰 朝

廷之恩我何與焉漢庶人逆謀旣彰 上疑長沙有

通謀者公曰謀出於彼他人何與臣敢以百口保之

十九年議 親征北虜羣臣無敢諫者公曰我受國

厚恩不可不死爭約尚書方賓同諫曰公但來吾自
言之入叩頭言頻年師出無功軍馬儲積十喪八九
況今災眚屢作內外俱疲 聖體少安遠涉風沙誠
未便 上怒乃命公整邊儲於口北賓懼自縊遂併
籍歸家命錦衣官立取公回至則方起版理儲錦衣
促之公曰姑俟畢此不然恐有侵死吾安之不以累
公及至 上問征虜得失公對如初歷言自古不勤
遠略之意命繫於內官監 皇太孫屢請赦之 上
命中使覘之因問 上待公厚今繫之暴亦有怨乎
公曰風雨霜露無非教也何敢怨 上意頗解猶繫

之 駕至榆木川不豫顧左右曰夏原吉愛我八月
訃至 仁宗時爲皇太子親臨繫所公趨出 皇太
子立中庭泣曰楊榮報父皇已賓天矣公伏地哭不
能起 上命卿可出視事公曰先帝罪人未聞遺詔
何敢出駕回命賜御厨饌咨以國事公言方今民力
竭於東南戎伍疲於漕運宜幸南京少蘇民困 上
曰朕意亦然復以詔條事宜訪公公請賑饑寬負省
賦役罷西洋寶船雲南交趾採金寶香料各處開辦
金銀課程每朝罷必呼公等二三大臣近御座前或
隨至便殿面議政務凡內外諸司所進章疏命擬旨

奏云某部知道或以問公公曰予奪之柄非臣下所
敢專故付之六部定其可否復取 上裁則事有所
分而權不下移也交趾請降 廷議疑其詐也更欲
興兵討之公曰兵疲矣譬如燧伏于身未潰則憂不
測已潰則宜進平和之劑俟血氣調和自愈若惟毒
之攻心腹內虛復生他患不若因其請降許其復國
自新二楊議亦同遂偃兵息民天下賴之

贈湯陽伯諡忠襄郭公資神道碑

楊榮

公諱資字存性姓郭氏河南武安人公生而穎敏志
氣超羣兒弱冠入邑庠從師受春秋有所造就洪武
辛酉入太學甲子領應天府鄉薦明年會試禮部對
策大廷賜同進士出身初擢戶部試主事丁外艱
服闋實授本部主事吏無容奸聲譽頓起陞都察院
左僉都御史無何尚書郁新以才薦之授前北平布
政司左叅議蒞事之初卽以本司弊政爲言太祖
高帝嘉其忠直陞本司右叅政公悉心殫慮贊佐有

方不數月陞左布政使精勤詳慎紀綱大振（此處有缺字）
跡良善獲安時 太宗皇帝在藩邸尤愛重之公有
所言無不聽納及起義靖難命公城守撫輯兵民供
給糧餉百費所需未嘗乏誤嘗以漢蕭何擬之 太
宗皇帝卽位論功召陞戶部尚書賜白金文綺楮幣
視諸伯未閱月以北平重地命乘傳掌布政司事未
幾詔建北京設行部拜公行部尚書公以北地軍民
初安生業始遂而官司所費冗濫當撙節以恤下乃
惓惓以法弊舉廢爲務或有不悅而謗公者 太宗
聞之降熱慰諭益以心腹任之滿考賜宴內廷頒救

獎諭錫以誥命贈公祖若考皆資政大夫北京行部
尚書祖母及母皆夫人歲辛丑 太宗皇帝都北京
革行部調公戶部職務最脞公勤以率下事有條序
仁宗皇帝嗣位念公舊德以尚書兼太子賓客已而
復念公抱疾艱於步履不忍煩以政事特陞太子太
師俾致仕歸鄉既加賜養又令戶部給公半俸蠲其
稅糧差徭特賜輿書慰勞甚至公歸杜門教子孫讀
書屏絕外累 皇上嗣登大寶春求老成念公祇事
列聖勞績居多詔起復掌戶部事免其起朝陽鈔二
萬貫公愈感激効忠雖祁寒盛暑必坐公署視事不

曾族條屬齊更莫不敬憚焉滿考賜宴于禮部筵以
勅書譬公如歲寒松柏愈老愈勁其優待隆厚如此
宣德癸丑十一月疾劇屢言蒙被朝廷重任無以效
報爲愧切切訓諸子及孫當感恩思報不及家事十
二月癸丑卒 上深悼惜爲公罷朝遣禮部尚書胡
濙賜祭勅工部製棺營喪葬贈特進光祿大夫柱國
湯陰伯諡忠襄官其子佑爲戶部廣東清吏司主事
公生元至正辛丑十一月己巳享年七十有三公廉
介勤慎剛果有爲自始仕至老視國事如家事凡所
施爲毅然自任不畏強禦雖怨有弗避害有弗辭與

人辯論嚴厲之氣見於詞色而推之於政略無害人
蠹物之心卒之日家無餘貲誠國家忠謹直亮輔弼
之臣也

資善大夫戶部尚書素軒古公朴神道碑

楊士奇

宣德三年二月十八日戶部尚書古公卒訃聞上
命進士康琰賜祭命有司給舟歸其喪且營葬事既
畢其子本奉禮部尚書蔚公所述事狀走北京介少
保夏公求書神道之碑余與古公同朝三十年知公
有廉靜之操諾而不辭公諱朴字文質號素軒古公
世家河南陳州諱義甫娶王生諱安道娶程公之大
父母父母也以公貴公之大父皆贈資善大夫戶部
尚書大母母皆贈夫人公洪武中舉鄉貢爲太學生

奉命清理郡縣田賦圖籍丁父喪歸服闋隸五軍所
事理刑遂奏家貧願仕得祿養母 太祖皇帝嘉之

除工部營部主事授承仕郎迎母就養京師居無幾
母沒官給舟歸葬服闋改兵部司馬部主事陞武選
員外郎授奉議大夫遂陞兵部右侍郎授嘉議大夫
太宗皇帝正大統轉左侍郎授通議大夫賜文綺襲
衣 上巡守北京侍 仁宗皇帝監國嘗奉命權禮

部及詹事府洪熙中改通政使是歲陞戶部尚書授
資善大夫賜誥命追贈二代遂謁告歸省墓賜鈔襲
衣公事親孝非其義一毫不苟取居官臨事早作夜

思勤勞弗懈一志於公無敢干以私者謹守祖宗成
憲不肯踰越或言事久於時小過不及者亦當損益
就中終不爲動永樂中建北京宮殿董伐木之役於
江西有愛民之心竣事特被賜資戶部主事劉良素
行不檢滿三載公考其績下良叩上之左右人求公
最考公曰貪侈之人幸未覺露不改行終當敗最考
不可得也良遂誣奏公他事既就逮繫 太宗皇帝
燭其誣竟釋公他日吏部奏授良誥命封贈其父母
仁宗皇帝曰豈弟君子福祿攸降是嘗誣奏大臣罪
者其得爲君子乎不與良卒以職敗衆服公之明公

所治職務退未嘗語其家人米粟之操確乎不務平
素不事生產華靡勝咏之玩纖毫不畜公退清坐
坐書冊自娛嘗病土奇往問之入其齋室几案間
有自警編一帙可以觀其所存矣洪熙誥辭有端厚
簡靜操行清潔之衷蓋見知於上者深矣卒之日無
餘累之積以遺子孫

資政大夫戶部尚書棠邑郭公敦墓誌銘

楊士奇

宣德六年四月十一日資政大夫行在戶部尚書棠邑郭公卒訃聞上悼嘆賜祭命有司給舟歸葬且營葬事公諱敦字仲厚姓郭氏其先自太原交城徙東昌棠邑祖諱忠妣石氏考諱政寬妣侯氏繼馬氏郭世有善德公自幼凝重端謹稍長游鄉校日勤講習已卓卓出倫華洪武癸酉以詩經中山東鄉試會試下第後擢戶部廣西清吏司主事歲餘有賢聲陞衡州知府下車咨民隱蠲弊興利修學政務教化崇儒

術禮賢行以表勸其民振恤無告郡俗貧死不能葬者焚屍沉之公相城東得廢地百餘畝榜曰義阡令民貧死者皆葬是又爲約教民有急相資助民利賴之嘗歲旱公齋沐致禱雨立降霑足蝗入境爲災公自爲文檄城隍神是夕大雨雷電蝗盡死凡所禱輒應城西有淫祠歲四月軍民男女聚謁祭祠下譴譁若狂公禁止之已而得風眩疾吏民爭勸罷禁弗聽疾亦瘳同僚有私取民財者公雖不面斥而義形於色其人頓首謝改過待之如初屬邑吏爭濯磨自效公退所謀諸心發諸言未嘗不在民事所秉正直襟

宇坦明言出而民信令出而民從不俟程督庶務畢
舉舍內蠶箔嘗有叢絲類織成蟬帶修廣適度郡人
謂公仁政之應在衢七年政化大行坐累徵詣京師
耆老數百人伏闕奏乞留理官執不可耆老皆涕泣
而退後廷臣有言公廉正不阿者召爲監察御史陞
河南布政司左叅政無幾調陝西以公留京師今禮
部尚書胡公言其行於 太宗皇帝曰郭敦有大臣
體宜在左右卽日召見以病弗克入遂遣御醫視疾
疾愈入謝獎勞再三賜鈔襲衣明日陞禮部右侍郎
兼太僕寺卿 仁宗皇帝臨御進戶部左侍郎兼府

寧府少詹事賜誥贈其祖考妣及妻宣德二年陞戶部尚書命鎮陝西歲餘召還在戶部無敢一毫干以私者未幾得疾上聞之命太醫往視數日竟不起春秋六十有二爲人純實溫雅事親愛敬兼至隆寒盛暑不懈閨門之內儀度清肅聲色未嘗留耳目公暇手不釋卷私居無惰容居官剛正人莫能奪所至整飭綱紀盡誠撫卹不徐不亟吏畏民懷冰蘖之操無遜古人雖官列六卿泊然布素身沒之日家無餘貲豈非篤行君子者乎

資善大夫戶部尚書李公昶墓誌

楊 榮

公諱昶字文燁姓李氏世居隴西之涇陽曾大父諱榮大父諱通父諱成皆積德行善樂義好施爲邑里所推重洪熙初以公貴得推恩贈其祖與父皆爲正議大夫資治尹戶部右侍郎祖母韓氏母李氏繼母孫氏皆淑人公自少敦厚穎敏刻志問學事親孝事長敬處夫婦昆弟族黨姻戚之間恩義藹然及爲邑庠生益自修飭爲師友所稱洪武丙子由鄉薦入太學司成論秀擢左軍都事有能聲尋陞戶部郎中續

用茂著永樂初肇建北京增置行部而難其人天寶
以公薦聞特陞行部右侍郎北京常靖難之後民甚
凋弊而行部初置政務糾紛公惟夙夜敬勤盡心協
贊凡所施設各適其宜歲丁酉北京營建材用所需
行部最爲繁劇公則不遑寧處協心經畫事無廢缺
壬寅春轉戶部贊佐彌至國之儲蓄民之貢輸以至
賦稅之損增金帛之出納或四方之旱澇災傷年穀
之所收豐歉公皆調度有方規畫有法及扈從北征
董運糧餉道經數千里士馬足用而無匱乏之虞公
之力又居多焉宣德五年冬公以老成爲 皇上眷

念特降勅陞公資善大夫戶部尙書賜以寶帶且命
專督收支京都及通州諸處倉糧方有條緒而大故
及之嗚呼惜哉

金榮襄公濂傳

戶書

蕭 鉉

公諱濂字宗瀚姓金氏淮之山陽人其先北平人也
曾祖諱誠 國初自宛平徙淮安之新城占籍焉祖
諱德考諱銘皆不仕三世皆以公貴贈榮祿大夫太
子太保兼戶部尚書妣皆贈一品夫人公賦性警敏
豁達自少勤問學經傳子史靡不誦補邑庠弟子
員永樂戊戌以書經第進士拜湖廣道監察御史凜
然持風裁宣德初巡歷廣東江西所至有弊旣還浙
江豪徒史慶真亡命有司索之不得皆被累詔公往
捕獲之以父憂去官尋起爲陝西按察副使方是時

虜酋朵兒只怕擾邊遂勅公巡撫兼督甘緩各郡糧餉規畫有方兵食給足以功擢都察院僉都御史分鎮寧夏久之陞副都御史虜既款附邊境乂安公暇日輒詣學命諸生講論經史將校環聽之雖寒暑不廢西人翕然頌公以理不獨邊務修而已且志教化也未幾召還陞刑部尚書在職悉心庶獄姦慝無所貸而欽恤一念不忘正統戊辰閩寇鄧茂七作亂甚張命偏師往勦之而以公理兵政時將校多不戢士公患之有犯者一繩以法授諸將以方略而躬撫輯其民俾各適有居賊境盪滌民用以寧遂全師

而還公之功爲多以故隨兼太子賓客尋進太子太保兼戶部尚書景泰初邊務方殷供餉匱乏公日夜經畫以濟一時之急有所見輒言於上汲汲以足國爲已任疵訕紛騰毅然弗顧也間四方水旱憂形於色講求荒政奏遣使賑卹嘗辭師保之俸詔優答之謂其於軍國之事多所用心公益感激自效日忘其勞君子以謂公於是職無愧焉景泰五年二月二十日以疾卒于位享年六十有三公自入官以來歷事五朝盛名偉績卓然一代重臣而尤爲今上所知計聞嗟悼輟視朝一日命有司治葬事遣

官諭祭追封沐陽伯諡榮襄

戶部尚書王佐傳

佐山東海豐縣人永樂中爲吏科給事中宣德初陞
戶部右侍郎往陝西經理糧儲疏言軍衛倉作弊百
端請改隸有司使官軍俱得俸糧天下稱便已而鎮
守河南盜息民安未幾召回提督京倉久之命理部
事進陞尚書爲人敦實寬厚心地坦夷器宇洪偉望
之知爲大臣在任雖無赫赫名而政亦未嘗不舉也
景泰初錄其死難贈少保官其子道爲戶部主事

戶部尚書張公鳳傳

張鳳益子母有娠一夕夢大星出懷中覺而生鳳鄰
人有降神者鳳往觀之無驗叩之曰卿在此及去神
乃降衆驚異曰此子不凡矣稍長從太常少卿鄭雍
言授春秋卽能問難永樂己丑王師失利益卒于陣
鳳母還家母病侍湯藥不解帶及母卒居喪盡哀人
服其孝登宣德丁未進士授江西司主事時江西豪
民爲逆者千餘人繫獄未決付鳳理之一訊得其情
列狀上聞獲免死者數百人大司寇魏源嘉其才
特令總理合部章奏尋委審錄在京罪囚峇益普特

陸本部右侍郎會在京草場出納多弊 勅命建督
不數月間宿弊盡革復調南京戶部侍郎通疏曰南
京根本重地糧儲不可不積宜每歲分米一百萬石
遂爲例往年南京收支糧草事委憲臣提督至是勅
兼督益以出納嚴謹故也時人以其執法呼爲板張
歷陞本部尚書轉南京兵部叅贊機務景泰壬申召
爲戶部尚書時邊務方殷錢穀之費動以萬計前大
司徒深以爲憂至則處之裕如國用不勞而足天順
初仍改南京戶部以疾卒嘗渡江偶一舟覆于急流
中卽捐白金購人救之舟中之人賴以全活李文達

稱其歷官幾四十年勤慎如一真謂一代名臣云

戶部尚書李敏傳

戶部尚書李敏直隸新安縣人由舉人任鳳陽府同知正統初以大臣薦陞汝寧府知府精勤政務吏民畏服尋陞應天府尹能聲益著任滿郡民保留之者千數百人 上命敏復任陞二品俸景泰初陞戶部右侍郎巡撫南直隸總督糧儲未幾陞本部尚書仍理巡撫事天順元年致仕七年十二月卒遣官諡祭

戶部尚書沈固傳

萬曆
固

戶部尚書沈固字仲威直隸丹陽縣人弱冠領鄉薦
初授山東沂州同知時有建言州西寶山社產銀鑛
者詔下有司核實固執奏請費多而得少恐勞民且
致變事得中止民甚感之未幾以安養軍民事徵入
爲戶部員外郎尋進郎中擢山東左叅政督餉給軍
運北洪熙間命以本官於大同總兵官武安侯鄭亨
處書辦邊方兼用文臣始此正統初進戶部右侍郎
己巳之變車駕北狩幸大同偕守將出見奉命括
官庫金帛以犒虜酋或以爲不可固盡所有以獻事

開戶部請下吏較勘然事卒不竟其年以城守勞遷
右都御史尋以却虜功轉左都御史言者攻之不已
遂乞致仕 英廟復位石亨薦爲戶部尚書寵貴日
隆三年復休致成化三年二月卒賜祭葬如例固體
貌魁梧性直率不拘細行歷官五十餘年雖無大建
明然在邊二十七年深達虜情上下安之

戶部尚書年公富傳

戶部尚書年富字大有鳳陽懷遠縣人其先本嚴姓
誤爲年富領永樂丁酉鄉薦會試中乙榜爲德平訓
導九載赴京擢吏科給事中命掌刑科事糾正違失
直氣凜然宣德乙卯吏部推富爲光祿少卿奏留中
不下適陝西缺右叅政乃以陞富富峻厲敢爲衆推
奏令總理邊儲富至邊遂斟酌遠近定其徵科鈎考
收支防其出入由是宿弊頓革正統甲子陞河南右
布政使適歲饑流民入境者數萬公肆創切富設法
賑恤撫定之轉左布政使土木之變邊境道阻部數

督督運邊糧民聞富督運冒險而進無後期者
左副都御史提督大同軍務兼理邊儲時邊儲廢弛
法度不立而冒軍功盜邊儲之弊尤甚富痛革之一
時武將如石亨輩不得遂其私尤忌之天順初亨得
志諷科道官劾富既致仕而石彪憾猶未釋復摘摭
遷至京事多誣仍致仕不數月起爲南京兵部右侍
郎尋轉戶部左侍郎巡撫山東又改左副都御史奏
徙降虜之居東昌者用銷未然之患四年春召拜戶
部尚書錢穀會計躬任其勞事有關於利害者僚佐
或難之富曰第行之吾當其責公毋署名可也吏胥

諸司莫不畏憚束手聽命富以西鄙多事用非其人
奏舉布政楊瑯知府余子俊可用而請黜布政使孫
毓吏部尚書王翔言其侵已職請下干理富曰薦賢
爲國非有私也因求退不允忤翔專恣疽發而卒時
天順八年四月年七十 上聞之震悼賜諡曰恭定
遣官諭祭命有司營葬事富天資剛勁所至以嚴爲
治人不可撓以私及掌國計愛惜用度持正不阿得
大臣體然亦爲人所窺伺其屬有作弊者知富多疑
過州郡奏災傷欲其准則言不可准欲其不准則言
可准富必反其所言而從違之多中其姦計至是卒

聞者深惜之而咎翔之專復云

戶部尚書張睿傳

張睿字志通河南鄆陵縣人宣德庚戌進士授吏科給事中陞都給事中未幾拜戶部右侍郎提督內外倉場糧草正統己巳達賊犯京師奉勅般運通州城外糧草入城如未盡而賊至聽悉焚之旣而聲息愈急衆卽欲舉火睿厲聲叱之曰第悉力般入賊至焚之未晚以是糧草獲全景泰庚午丁內艱命奔喪復任轉本部左侍郎仍理前事天順中陞本部尚書蒞任七載引年致仕成化七年五月卒賜祭命有司營葬睿爲人質直不事表襮雖無大建明然亦謹慎自

持以守其職云

資德大夫正治上卿太子少保戶部尚書贈少

保謚恭襄馬公昂墓誌

劉 珣

公諱昂字景高姓馬氏其先河南祥符人後移籍河
南之滄州大父諱才興考諱欽俱以公貴累贈資善
大夫都察院左都御史祖妣楊妣秦贈夫人公永樂
癸卯鄉試中試明年會試下第入國子監宣德丙午
以儀容俊偉聲音宏亮授行在鴻臚寺序班正統丁
巳用廷臣薦陞監察御史奉命整飭宣府大同偏頭
關兵備及巡按陝西淮揚徽州等處所至有聲癸亥
行在刑部獄禁失嚴囚因劫獄逃竄幽書以下咸禁

劉路捕乃陞公右侍郎未幾改右副都御史叅贊
肅軍務時叅贊都督王喜玩寇失機公至劾其罪議
戍遼東官軍畏服先是赤斤蒙古罕東等衛番族恣
肆鈔掠至強切總兵進貢馬駝公受命帥將士討之
盡得主名舉示及擒其僞祁王銷南奔并妻子械送
京師自是番人不敢近邊已巳北虜寇甘州公令人
畜悉入城堡簡精銳選騎射躬振甲冑出屯山隘以
伺虜聞遁去西邊方倚公而以乞疾忤旨乃命致仕
景泰庚午也甲戌兩廣夷寇擾攘朝廷召王忠肅
公還爲吏部尚書起公代忠肅總督兩廣軍務兼巡

撫便益行事公乃大布 朝廷威德帥總兵方岳并

上官兵民勦其爲暴害者生致其僞將軍周鐵盛盤
馬蹄等獻闕下 上遣行人勞以綵幣寶鈔陞右都

御史丙子征斗峒賊平轉左都御史天順丁丑有不
足公者造謫 上命致仕及入見復留命之山西巡

察邊境比還遂理院事戊寅陞兵部尚書辛巳虜寇

陝西勢甚急命懷寧伯孫鏜爲總兵公仍總督刻日

出師是夕曹欽反公與鏜討之欽伏誅進太子少保

仍掌兵事自是 上寵待特厚賞賚以金玉束帶纁

金麒麟服其銀幣玩器書畫禽鳥時鮮之賜歲無虛

日衣有號撒哈喇者雖勳戚有不可得者公與賜焉
屢召遊西苑南宮及扈從較獵南海子一時進退廷
臣亦必召公咨訪甲申 今上嗣位信任益篤調戶
部尚書尋奉勅同右都御史林聰給事中潘禮陳越
按籍點軍士既畢乃分精銳者爲十二管以備調用
又籍軍帥之賢否而黜陟之慮後事之違變而禁約
之實出公之議云戊子公年七十時有災異謫見力
求退避從之且賜勅以榮之陞辭復賜燕饌并寶鈔
若干既歸八年卒訃聞 上嗟悼贈少保諡恭襄遣
官諭祭營葬事

戶部尚書楊公鼎傳

黃佐

楊鼎字宗器陝西咸寧人少聰悟日記萬言家貧父善祿命知其必大貴領鄉試首薦正統丙辰上春官不第當入北監聞祭酒陳敬宗學行乃求入南監卒業不携一僮以自隨攻苦力學躬自執爨恬如也敬宗試其文察其行嘆曰閉戶端居甘人所苦雖簞瓢之樂不足過也每亟稱其賢有郡守欲以其子妻之鼎以不告父母爲辭乃托鼎同鄉兵部尚書徐琦與敬宗言曰鼎清貧而彼富裕父母聞之于心必安敬宗亦勸鼎從之鼎對曰原憲雖貧於道則富衛蠲雖

富於道則貧鼎也敢貪富乎哉敬宗益羨其操守旦
夕與之講解疊疊不倦已未鼎中會試第一 廷試
第二拜翰林院編修一時館閣鉅公如楊士奇輩皆
重其素履鼎旣仕勵志功業略去詞華嘗建言修飭
戎備通漕三邊人誦其迂及胡虜大舉詔鼎撫守近
畿有經略功欲擢爲副都御史力辭不就遂循資自
侍講累遷戶部尚書以功名終鼎娶時年已三十夫
婦相敬如賓有子時暢官至太常卿兼翰林院侍講
學士

楊鼎再乞致仕詔曰朕以卿久練部事方隆委任但

累乞休致特允所請其令有司月給米二石人夫四名應用以副朕優老之意仍賜之勅曰卿發身賢科歷官翰苑纂修講讀勞效良多逮遷戶部殫心經理國賦通融厥績茂焉朕方圖任老成切于倚毗卿乃引年至再欲遂閒適茲特允所奏命給驛舟送卿還鄉仍令有司月給米二石歲撥人夫四名以備贍用夫優老敬賢者朕之心執禮養恬者卿之志功成身退者士之榮去國懷忠者臣之厚卿其篤念乎此優游田里化導鄉人使風俗歸淳治理臻盛則足以副朕眷遇至意卿豈不亦永終譽哉先是大臣致仕未

有給米撥夫之例有之實自鼎始人咸謂朝廷優老敬賢之意良不爲過云入南監時南京禁夜燈而國學尤嚴鼎潛具小罌窺之籠燈而誦爲巡者所覺陳知其端慎貸之侍講兼春坊左中允以才堪經理超陞戶部右侍郎恐不勝任書十思於座隅曰量思寬犯思忍勞思先功思讓坐思下行思後名思晦位思卑守思終退思早恒自省焉由是蒞政綽然有聲時陳汝言用事鼎不附爲汝言所譖賴上知無過獲免轉左侍郎及進官尚書恒持正不回事有不可無論權貴雖論旨不從嘗立稅法鹽法經久不易

故戶部至今稱之爲楷範焉後加太子少保致仕勅
賜月俸與夫恩禮特厚居家冠婚祠祀遵用古禮其
家法爲縉紳所宗又築靜善書院延師以教里中子
弟歲饑悉出所蓄以賑親舊嘗語人及諸子曰吾平
生無可取者但識廉恥二字耳年七十六病卒卒之
日有雲覆庭隨即大風雷電交作移時雷止風息氣
絕訃聞 欽賜葬祭贈太子太保諡莊敏

戶部尚書翁公世資墓銘

周洪謨

公諱世資字資輔號冰崖祖竹所父醉菴皆以公貴
贈至資政大夫戶部尚書醉菴仁化教諭陞國子助
教又陞翰林檢討公與兄世用隨侍講學學成公上
章願入爲太學生詔特俞之正統辛酉領鄉薦明年
舉進士乙丑授戶部主事戊辰世用亦舉進士父子
兄弟同入朝叅時人榮之大司徒淮安金公嚴毅諸
屬無足當其意者獨深器公凡奏議必預商確暨進
郎中往勘南畿水災奏蠲糧米七十餘萬發粟賑貧
全活甚衆陞工部侍郎多所建明庚辰歲歉蘇松歲

造絢幣通負甚多公奏乞免忤 旨貶爲衡州知州
甲申陞江西左布政使越二年陞都察院副都御史
巡撫山東適歲大侵野多餓殍公發廩及勸富民出
粟得四百萬石西三府賴以不流散德之如父母壬
辰遷戶部左侍郎戊戌拜本部尚書總督通州及京
師糧儲辛丑特命掌部事以力衰固求去卒于途

榮祿大夫太子少保戶部尚書涿鹿殷公謙墓

誌銘

張昇

公諱謙字文撝遜齋其號也涿州人考諱禮字宗敬鄉薦中乙榜掌教河南孟縣妣太夫人路氏感異夢而誕公幼卽穎異隨考陞掌西安府教讀書績文日有造詣叅政武城王公愛之以女女焉年踰弱冠正統戊午魁順天明年第進士拜南京戶部山西司主事景泰壬申陞兵部職方司郎中癸酉陞通政使司右通政天順改元言事出知河南汝寧府時旱蝗作禱之隨息開社學以收俊秀藝蔬果以備凶荒士民

悅之以內艱去服闋改知山西太原府府最劇而得
人心不異汝寧給藥舉喪瘞骸叢塚生死皆賴之民
苦狠暴捕之盡絕成化改元陞陝西布政司右叅政
管糧會大軍西征榆林缺儲公督餉隨足益壯軍聲
虜聞宵遁丙戌秋又罹外艱戊子復山西右叅政仍
管糧庚寅陞右布政使壬辰陞都察院右副都御史
巡撫大同賑民選軍無不精當高築垣壘沿邊有備
虜不敢犯癸巳春改巡撫宣府又築沿塞垣壘益加
堅密極邊守瞭軍寒給皮襖帽以愆之宣府大同例
各自守公疏允二邊合勢互相救援甲午秋寇來熾

甚 上命將出師公先期分禦偏師林右衛遇寇與之交鋒斬寇首二獲馬畜器械無算軍至而寇已去全師還京戊戌夏五月陞戶部右侍郎己亥秋轉左辛丑春陞本部尚書總督京通等倉糧儲贈祖考俱資政大夫戶部尚書祖妣及妣俱夫人甲辰命掌部事仍總督冬十有一月加太子少保賜內驥紅幣各一幣有副丙午秋九月懇疏乞休詔曰可遂家居踰十有九載又進一品階弘治甲子以疾卒壽八十有八有司以聞 上軫耆德賜以祭葬

榮祿大夫戶部尚書隆慶李公衍神道碑

徐溥

公諱衍字文盛姓李氏其先山東歷城人永樂初有諱某者謫戍南丹後改編隆慶州民遂籍隆慶是爲公之祖考考諱某皆以公貴贈戶部右侍郎公自少穎悟爲州學生有聲場屋景泰壬申登進士第授兵部主事歷陞員外郎郎中皆舉職成化二年升河南右布政使所部課民種桑東戶若干株因以考長吏勸惰且令月條上其他政善則溫言慰之不善則訶譴不少貸由是州縣之吏罔不知懲勸四年丁母夫

人憂服除改四川奉

勅提督松藩等處糧儲出見

彭索河荒田彌望乃召其土人而問之曰是可耕地而不耕何也衆皆謂生蠻往往擾耕爲患公則相視要害設橋梁墩堡塹柵爲防民乃耕耕遂無擾時松藩有堡曰張臘茂州有堡曰松溪皆爲生蠻所攻公與叅將前後擒殺數百人蠻乃遠遁捷聞 朝廷屢有寶鈔金幣之賜灌縣都江堰壞歲役夫四萬人修之吏得資緣爲姦公去其十九築不逾歲而功告成民永賴焉七年陞河南右叅政其居官聲實一如叅議時十一年陞江西右布政使未幾陞都察院右副

弩

都御史巡撫河南至則刻刮宿弊理冤獄黜賊吏定
九等差役法時黃河水溢城不浸者三版公視東南
角低下乃分命守土之官日夜疏濬始免決囓患十
六年陞戶部右侍郎尋奉勅巡視山海邊關整飭兵
備置牀子弩一萬五千張弩可射三百餘步又設飛
石飛木可發五七十步者各數十萬削山坡成峭壁
東西數百里歸而以圖進 上賜鈔四千貫二十年
轉左侍郎權尚書事時河南山東北直隸連歲旱穀
無所出州縣當輸邊者類索銀就糴以輸米踊貴斗
至數百錢然亦實無饒石賣者而武吏催督道路旁

午勢甚張皇公聞之乃請輸銀太倉而以太倉之米轉輸於邊米價遂平二十年奉勅總督三邊軍儲兼賑濟饑民時關陝不雨三年矣公齊心默禱所至天輒雨又引渭水爲渠經行百餘里以利居民是歲大稔民賴以全活者甚衆公還朝復具圖以進上喜又出寶鈔四千貫賜之遂有意大用公矣明年陞本部尙書總督京通兩倉內外僚吏素熟公名皆慄慄危懼惟恐有犯公者時公雖不大聲以色事固無不理也二十三年公遽有去志遂上疏乞身以歸買田築室於隆慶城西北日與親舊觴咏其中或問以官

事則不應弘治五年以建立 皇太子思進一品階
七年卒於家年七十有四

戶部尚書劉昭傳

劉昭字克明陝西邠州人景泰二年進士授兵科給事中天順元年陞通政司右叅議五年丁父憂去任特命奪情起之七年陞左通政成化九年陞工部右侍郎十五年陞尚書二十年加太子少保二十三年改戶部尚書尋落太子少保致仕弘治三年十一月卒訃問賜祭葬昭美姿儀善談論通政務敷奏甚稱英廟意嘗值端午節 駕幸廣寒殿大臣俱從上問劉叅議安在左右以昭秩五品不得與對命特以一品服賜之其寵如此然其才幹亦有過人者故

所至皆有能官之譽在工部最久所言動中事幾故
往往見聽陰有節省之益其致仕落職蓋爲時要家
言官所論以其子錦衣千戶綺之事及之云

資政大夫戶部尚書贈太子少保諡恭靖李公

敏傳

張良知

李敏字公勉襄城人登景泰甲戌進士第授湖廣道
監察御史天順丁丑貴州蠻賊哨聚命往撫捕之比
還出按畿內力革宿弊以運餉薊州者必由海口多
遭覆溺建議別鑿三河直抵薊州以避海道軍民便
之累陞浙江湖廣按察司山西四川布政使入爲都
察院右副都御史奉勅巡撫大同兼理軍務先時虜
侯守墩軍下取水輒肆戕害敏至設伏擒之自是虜
不敢犯山東河南運邊糧者歲數萬石更涉險遠率

倍費始得達敏計歲會外令易銀給將士以其餘市
戰馬治軍裝至今以爲常成化年召爲兵部右侍郎
以疾乞歸久之通河南大饑疏救荒數事封上因數
左副都御史巡撫保定等府兼提督紫荆等關未幾
改總督漕運巡撫鳳陽等府擢戶部尙書時天下頻
歲水旱所司往往乞免田租其章奏敏皆手自參決
大要以足國安民爲急 上嗣位例行賞賚而邊境
更以儲峙缺乏爲奏敏區畫有方用以不乏嘗言鹽
課爲國用所資比歲法壞宜簡命風憲大臣理之詔
如其議又止貴戚畿地之乞鷹房之討因京師水災

而陳畿內官裝之濫豪勢之橫人所難言者公多建
白在戶部五年以疾上疏得休致歸主內黃疾革遂
卒贈太子少保諡恭靖

戶部尚書贈太子太保葉公淇傳

潘 埴

葉公淇字本清其先金華人宋宰相衡之後曾祖顯以詩鳴有樵雲獸唱集傳于世祖士廉洪武初戍淮爲淮安衛人公長身修髯見者知爲偉器景泰間登進士第拜監察御史天順間坐累景帝時有同姓名御史議加南城天順復辟其人已外補公誤承面鞠極慘內廷知其枉 帝悟逮其人誅之黜公知武陟縣改清江寶坻皆有惠政成化初用薦超陞廣西按察司僉事南丹土官侵掠臨邑躬爲撫定城柳城洛

容以通流賊蓄水通粟以濟饑民賊據南寧奉勅督
捕擒其首惡攻荔浦率兵勦平之詔賜綺帛俸一幼
兒七歲後監軍者道遺一俘婦詢之卽兒母也乃以
配國丁改山東遷陝西副使領岷州兵備松潘賊久
爲邊患撫綏乃定又會兵勦洮州賊斬首甚衆擢河
南按察使拜都察院左僉都御史巡撫山西兼督鴈
門諸關歲屢歉發廩賑卹全活者衆垣曲流民嘯聚
至數千督有司撫之亂竟不作調大同兼贊理軍務
請設井坪千戶所又增築諸堡減加徵草數罷土兵
戍邊之不便者 孝宗卽祚召爲戶部右侍郎轉左

侍郎進尚書加太子少保有姦民獻大名川地爲
皇莊貴臣主之半不可解力排羣議卒歸于官哈密
爲土魯番所陷守臣請暫給廩食處之內地公曰是
自貽患也遂弗給中帑告乏議鈔錢清船料起存積
及王府田租從有司徵納以省侵擾其額外陳乞
者後先相繼多據理止之間以疾告上命醫診視
遣中官禮問于家疾再作具疏乞休詔許給驛歸鄉
卒年七十六朝廷遣官諭祭命有司營葬如制特
贈爲太子太保益異數云

戶部尚書侶鍾傳

戶部尚書侶鍾字大器兗州鄆城人成化丙戌進士
授監察御史巡兩淮鹽按直隸徽州又按浙江皆力
持憲典還掌諸道奏牘都御史馬文昇巡撫遼東爲
權隔汪直所中諷使劾之鍾不應遂被譖筆于朝用
都御史王越薦擢大理寺右寺丞遷右少卿虜犯大
同命鍾出撫畿甸擢都察院右副都御史巡撫保定
等六府兼督紫荆等關河間瀕海民地爲勢豪所據
鍾奪之還民陞刑部右侍郎以內艱歸道與漕運都
督王信卒忤爲所懇會當道者不說於鍾謫雲南曲

靖軍民府知府弘治二年服闋改徽州府復召爲大理寺左少卿遷右副都御史巡撫蘇松諸府兼總督糧儲擇廉幹吏授以法使監其事民無流負運官交兌使之召爲戶部左侍郎總督京儲改吏部進右都御史陞戶部尚書稽覈羨餘數年積銀四十餘萬兩慮國用不足疏汰內降官吏減內侍及畫工番僧酒餼又以天下存畱糧歲用不足請郡王以下量爲裁處又言太倉銀不宜收入內庫庫所蓄金帛不宜脩齋造像及充私賞城門中官不宜干預國課其辭甚切有成里奏乞兩淮長蘆官鹽風雨消折之數鍾執

無之會歲報籍至有私錄以進者鍾由是得罪內不自安因再疏請老不許旣而疾甚會東廠發其子瑞受金事復請老乃許令給驛歸十八年武宗卽位詔進榮祿大夫正德六年十一月卒賜祭葬如例

資善大夫戶部尚書贈太子少保諡襄毅秦公

紘傳

表 表

秦紘字世纓山東單縣人也景泰辛未進士授南道御史以事劾中官撫降北黃驛丞御史練綱薦知雄縣歷嘉穎二州有惠政成化中爲鞏昌知府清廉自守禁官府買賣歷遷副都御史巡撫陝西時秦府旗校肆橫民苦之紘悉擒治不少貸秦王不能堪奏紘欺蔑 純皇帝怒逮下錦衣獄命內臣尚亨籍其家止得黃絹一疋故衣數事亨還奏 上親閱其貲嘉歎良久曰紘貧一至是邪詔釋紘且賜鈔萬貫以旌

其廉調撫河南汪直以事至他巡撫率屬禮以見絃
獨與抗禮直素重絃不較也而絃密疏直多帶旗校
騷擾地方請禁治之直還京上問諸省撫臣孰賢
直獨稱絃廉能上以絃疏示之直叩頭伏罪稱絃
賢不已上釋之總制兩廣時總兵官安遠侯柳景
貪而不法絃論之逮下刑部獄追贓鉅萬覈其爵景
挾戚昵干內降冀減其贓且撫他事誣絃亦被逮赴
獄坐免惠諫交章申赦吏部尚書王恕極言絃可大
用乃起爲戶部尚書繼爲都御史風采益峻劾罷御
史姜絳輩臺綱肅然人謂有顧佐之風平生剛毅廉

介歷官四十餘年所居僅蔽風雨及卒家無餘貲未
幾子孫有貧乏不能存者袁袁曰秦公挺挺守正不
撓能使汪直稱其賢此非誠服其心爾耶

通鑑纂要卷之二十八